

## ॥ पञ्चमः प्रश्नः ॥

## ॥ तैत्तिरीयसंहितायां पञ्चमकाण्डे पञ्चमः प्रश्नः ॥

यदेकेन सऽस्थापयति यज्ञस्य सन्तत्या अविच्छेदायैन्द्राः  
 पशवो ये मुष्कुरा यदैन्द्राः सन्तोऽग्निभ्यं आलभ्यन्ते देवताभ्यः समदं  
 दधात्याग्नेयीस्त्रिष्टुभो याज्यानुवाक्याः कुर्याद्यदाग्नेयीस्तेनाग्नेया  
 यत्रिष्टुभस्तेनैन्द्राः समृद्धौ न देवताभ्यः समदं दधाति वायवे  
 नियुत्वन्ते तूपरमा लभते तेजोऽग्नेर्वायुस्तेजस एष आ लभ्यते  
 तस्माद्यद्रियङ्वायुः (१)

वातिं तद्रियङ्मुग्निर्दहति स्वमेव तत्तेजोऽन्वेति यन्न नियुत्वन्ते  
 स्यादुन्माद्येद्यजमानो नियुत्वन्ते भवति यजमानस्यानुन्मादाय  
 वायुमतीं श्वेतवतीं याज्यानुवाक्ये भवतः सतेजस्त्वायं हिरण्यगर्भः  
 समवर्तताग्र इत्याघारमा घारयति प्रजापतिर्वै हिरण्यगर्भः  
 प्रजापतेरनुरूपत्वाय सर्वाणि वा एष रूपाणि पशूनां प्रत्या लभ्यते  
 यच्छ्रुणस्तत् (२)

पुरुषाणां रूपं यत्तूपरस्तदश्वानां यदन्यतोदन्तद्गवां  
 यदव्या इव शफास्तदवीनां यदजस्तदजानां वायुर्वै पशूनां  
 प्रियं धाम यद्वायव्यो भवत्येतमेवैनमभि संजानानाः पशव उप  
 तिष्ठन्ते वायव्यः कार्या(३)ः प्राजापत्या(३) इत्याहुयद्वायव्यं  
 कुर्यात्प्राजापतेरियाद्यत्प्राजापत्यं कुर्याद्वायोः (३)

इ॒या॒द्य॒द्वा॒य॒व्यः॑ प॒शु॒र्भ॒व॑न्ति॒ तेन॑ वा॒यो॒र्नै॒ति॒ य॒त्रा॒जा॒प॒त्यः॑  
 पु॒रो॒डा॒शो भ॒व॑न्ति॒ तेन॑ प्रा॒जा॒प॑न्ते॒र्नै॒ति॒ य॒द्वा॒द॒श॒क॒पा॒ल॒स्तेन॑  
 वै॒श्वान॒रा॒त्रै॒त्या॒ग्रा॒वैष्ण॒व॒मेका॑द॒श॒क॒पा॒लं नि॒र्व॑पति दी॒क्षि॒ष्य॒मा॒णो॒-  
 ऽग्निः॑ सर्वा॑ दे॒वता॒ विष्णु॑र्य॒ज्ञो दे॒वता॑श्चै॒व य॒ज्ञं चा॑ र॒भते॑ ऽग्नि॒र॒व॒मो  
 दे॒वता॑नां॒ विष्णुः॑ प॒र॒मो यदा॑ग्रा॒वैष्ण॒व॒मेका॑द॒श॒क॒पा॒लं नि॒र्व॑पति  
 दे॒वताः॑ (४)

ए॒वो॒भ॒यतः॑ प॒रि॒गृ॒ह्य य॒ज॑मा॒नो॒ऽव॑ रु॒न्धे पु॒रो॒डा॒शेन॑ वै दे॒वा  
 अ॒मुष्मि॑ल्लो॒क आ॑र्धु॒वं च॒रु॒णा॒स्मिन् यः का॒मये॑ता॒मुष्मि॑ल्लो॒क  
 ऋ॒ध्रु॒या॒मि॒ति स पु॒रो॒डा॒शं कु॒र्वी॒ता॒मुष्मि॑न्ने॒व लो॒क ऋ॒ध्रो॒ति॒  
 यद॒ष्टा॒क॒पा॒ल॒स्तेना॑ग्ने॒यो य॒त्रि॒क॒पा॒ल॒स्तेन॑ वैष्ण॒वः स॒मृ॒द्धौ  
 यः का॒मये॑ता॒स्मि॑ल्लो॒क ऋ॒ध्रु॒या॒मि॒ति स च॒रुं कु॒र्वी॒ता॒ग्ने॒र्धृतं॑  
 विष्णो॑स्तण्डु॒लास्त॑स्मात् (५)

च॒रुः का॒र्यो॑ऽस्मिन्ने॒व लो॒क ऋ॒ध्रो॒त्यादि॒त्यो भ॑व॒ती॒यं वा  
 अदि॑ति॒र॒स्यामे॒व प्र॒ति ति॑ष्ठ॒त्यथो॑ अ॒स्यामे॒वाधि॑ य॒ज्ञं त॑नु॒ते यो वै  
 सं॒व॒त्स॒र॒मु॒ख्य॒मभृ॑त्वा॒ग्निं चि॑नु॒ते यथा॑ सा॒मि गर्भो॑ऽव॒पद्य॑ते ता॒दृगे॒व  
 तदा॑र्ति॒मा॒र्च्छे॒द्वैश्वान॑रं द्वा॒द॒श॒क॒पा॒लं पु॒रस्ता॑न्नि॒र्व॑पे॒त्सं॒व॒त्स॒रो वा  
 अ॒ग्निर्वै॑श्वान॒रो यथा॑ सं॒व॒त्स॒रमा॑त्त्वा (६)

का॒ल आ॑ग॒ते वि॒जा॒य॑त ए॒वमे॒व सं॒व॒त्स॒रमा॑त्त्वा का॒ल  
 आ॑ग॒ते॒ऽग्निं चि॑नु॒ते ना॑र्ति॒मा॒र्च्छ॑त्ये॒षा वा अ॒ग्नेः प्रि॒या त॑नू॒र्यद्वै॑श्वान॒रः

प्रियामेवास्यं तनुवमव रुन्धे त्रीण्येतानि हवींषि भवन्ति त्रयं  
इमे लोका एषां लोकानां रोहाय॥ (७)

यद्रियंङ्कायुर्यच्छृणुस्तद्वायोर्निर्वपन्ति देवतास्तस्मादात्वाष्टात्रिंशच्च॥ [१]

प्रजापतिः प्रजाः सृष्ट्वा प्रेणानु प्राविशत्ताभ्यः पुनः सम्भवितुं  
नाशक्रोत्सोऽब्रवीद्भवदिथ्स यो मेतः पुनः सञ्चिनवदिति तं  
देवाः समचिन्वन्ततो वै त आर्ध्रुवन् यथ्समचिन्वन्तच्चित्यस्य  
चित्यत्वं य एवं विद्वानग्निं चिनुत ऋध्रोत्येव कस्मै कमग्निश्चीयत  
इत्याहुरग्निवान् (८)

असानीति वा अग्निश्चीयतेऽग्निवानेव भवति कस्मै  
कमग्निश्चीयत इत्याहुर्देवा मा वेदन्निति वा अग्निश्चीयते विदुरेनं  
देवाः कस्मै कमग्निश्चीयत इत्याहुर्गृह्यसानीति वा अग्निश्चीयते  
गृह्येव भवति कस्मै कमग्निश्चीयत इत्याहुः पशुमानसानीति वा  
अग्निः (९)

चीयते पशुमानेव भवति कस्मै कमग्निश्चीयत इत्याहुः सप्त  
मा पुरुषा उप जीवानिति वा अग्निश्चीयते त्रयः प्राञ्चस्त्रयः प्रत्यं  
च आत्मा सप्तम एतावन्त एवैनममुष्मिल्लोक उप जीवन्ति प्रजा-  
पतिरग्निमचिकीषत तं पृथिव्यब्रवीन्न मय्यग्निं चैष्यसेति मा धक्ष्यति  
सा त्वातिदह्यमाना वि धविष्ये (१०)

स पापीयान्भविष्यसीति सोऽब्रवीत्तथा वा अहं करिष्यामि  
यथा त्वा नातिधक्ष्यतीति स इमामभ्यमृशत् प्रजापतिस्त्वा

सादयतु तया देवतयाङ्गिरस्वद्ध्रुवा सीदेतीमामेवेष्टकां  
कृत्वोपाधत्तानतिदाहाय यत्प्रत्यग्निं चिन्वीत तदभि मृशेत्प्रजा-  
पतिस्त्वा सादयतु तया देवतयाङ्गिरस्वद्ध्रुवा सीद (११)

इतीमामेवेष्टकां कृत्वोप धत्तेऽनतिदाहाय प्रजापतिरकामयतु  
प्र जायेयेति स एतमुख्यमपश्यत्तः संवत्सरमबिभ्रुस्ततो वै स  
प्राजायत तस्मात्संवत्सरं भार्यः प्रैव जायते तं वसवोऽब्रुवन्प्र  
त्वमजनिष्ठा वयं प्र जायामहा इति तं वसुभ्यः प्रायच्छुतं  
त्रीण्यहान्यबिभ्रुस्तेन (१२)

त्रीणि च शतान्यसृजन्त त्रयस्त्रिंशतं च तस्मात्त्र्यहं भार्यः प्रैव  
जायते तान्नुद्रा अब्रुवन्प्र यूयमजनिद्वं वयं प्र जायामहा इति तः  
रुद्रेभ्यः प्रायच्छन्तः षडहान्यबिभ्रुस्तेन त्रीणि च शतान्यसृजन्त  
त्रयस्त्रिंशतं च तस्मात्षडहं भार्यः प्रैव जायते तानादित्या अब्रुवन्प्र  
यूयमजनिद्वं वयं (१३)

प्र जायामहा इति तमादित्येभ्यः प्रायच्छन्तं द्वादशाहान्यबिभ्रुस्ते  
त्रीणि च शतान्यसृजन्त त्रयस्त्रिंशतं च तस्माद्द्वादशाहं भार्यः प्रैव  
जायते तेनैव ते सहस्रमसृजन्तोखाः सहस्रतमीं य एवमुख्यः  
साहस्रं वेद प्र सहस्रं पशूनाप्रोति॥ (१४)

अग्निवान्यशुमानं सानीति वा अग्निर्धविष्ये मृशेत्प्रजापतिस्त्वा सादयतु तया देवतयाङ्गिरस्वद्ध्रुवा सीद  
तेन तानादित्या अब्रुवन्प्र यूयमजनिद्वं वयश्चत्वारिंशच्च॥ [२]

यजुषा वा एषा क्रियते यजुषा पच्यते यजुषा वि मुच्यते  
यदुखा सा वा एषैतरहिं यातयाम्नी सा न पुनः प्रयुज्येत्याहुरग्रे  
युक्ष्वा हि ये तव युक्ष्वा हि देवहूतमा९ इत्युखायां जुहोति तेनैवेनां  
पुनः प्र युङ्क्ते तेनायातयाम्नी यो वा अग्निं योग आगते युनक्ति युङ्क्ते  
युञ्जानेष्वग्रे (१५)

युक्ष्वा हि ये तव युक्ष्वा हि देवहूतमा९ इत्याहैष वा  
अग्रेर्योगस्तेनैवेनं युनक्ति युङ्क्ते युञ्जानेषु ब्रह्मवादिनो वदन्ति  
न्यङ्कुग्निश्चेतव्या(३) उत्ताना(३) इति वयंसां वा एष प्रतिमया  
चीयते यदग्निर्यन्यश्च चिनुयात्पृष्टित एनमाहुतय ऋच्छेयुर्यदुत्तानं  
न पतितु९ शक्रयादसुवर्ग्योऽस्य स्यात्प्राचीनमुत्तानम् (१६)

पुरुषशीर्षमुप दधाति मुखत एवैनमाहुतय ऋच्छन्ति नोत्तानं  
चिनुते सुवर्ग्योऽस्य भवति सौर्या जुहोति चक्षुरेवास्मिन्प्रति दधाति  
द्विर्जुहोति द्वे हि चक्षुषी समान्या जुहोति समान९ हि चक्षुः  
समृद्धौ देवासुराः संयत्ता आसन्ते वामं वसु सं न्यदधत तद्देवा  
वामभृतावृञ्जत तद्वामभृतो वामभृत्त्वं यद्वामभृतमुपदधाति वाममेव  
तया वसु यजमानो भ्रातृव्यस्य वृङ्क्ते हिरण्यमूर्ध्नी भवति ज्योतिर्वै  
हिरण्यं ज्योतिर्वामं ज्योतिषैवास्य ज्योतिर्वामं वृङ्क्ते द्वियजुर्भवति  
प्रतिष्ठित्यै॥ (१७)

आपो वरुणस्य पत्न्य आसन्ता अग्निरभ्यध्यायत्ताः  
 समभवत्तस्य रेतः परापतत्तदियमभवद्यद्वितीयं परापतत्तदसा-  
 वभवदियं वै विराडसौ स्वराड्यद्विराजावुपदधातीमे एवोप धत्ते  
 यद्वा असौ रेतः सिञ्चति तदस्यां प्रति तिष्ठति तत्प्र जायते ता  
 ओषधयः (१८)

वीरुधो भवन्ति ता अग्निरन्ति य एवं वेद प्रैव जायते-  
 ऽन्नादो भवति यो रेतस्वी स्यात्प्रथमायां तस्य चित्यामुभे  
 उप दध्यादिमे एवास्मै समीची रेतः सिञ्चतो यः सिक्तरैताः  
 स्यात्प्रथमायां तस्य चित्यामन्यामुप दध्यादुत्तमायामन्याः रेतं  
 एवास्यं सिक्तमाभ्यामुभयतः परि गृह्णाति संवत्सरं न कम् (१९)

चन प्रत्यवरोहेन हीमे कं चन प्रत्यवरोहतस्तदेनयोर्व्रतं  
 यो वा अपशीर्षाणमग्निं चिनुतेऽपशीर्षामुष्मिल्लोके भवति यः  
 सशीर्षाणं चिनुते सशीर्षामुष्मिल्लोके भवति चित्तिं जुहोमि  
 मनसा घृतेन यथा देवा इहागमन्वीतिहोत्रा ऋतावृधः समुद्रस्य  
 वयुनस्य पत्नञ्जुहोमि विश्वकर्मणे विश्वाहामर्त्यः हविरिति  
 स्वयमातृणामुपधाय जुहोति (२०)

एतद्वा अग्नेः शिरः सशीर्षाणमेवाग्निं चिनुते सशीर्षामुष्मिल्लोके  
 भवति य एवं वेद सुवर्गाय वा एष लोकाय चीयते यदग्निस्तस्य  
 यदयथापूर्वं क्रियतेऽसुवर्ग्यमस्य तत्सुवर्ग्योऽग्निश्चितिमुपधायभि

मृशेच्चित्तिमर्चितं चिनवद्वि विद्वान्मृष्टेवं वीता वृजिना च  
मर्तात्राये च नः स्वपत्याय देव दिति च रास्वादिति मुरुष्येति  
यथापूर्वमेवैनामुप धत्ते प्राञ्चमेनं चिनुते सुवर्ग्योऽस्य भवति॥ (२१)

ओषधयः कर्जुहोति स्वपत्यायाष्टादश च॥ [४]

विश्वकर्मा दिशां पतिः स नः पशून्पातु सोऽस्मान्पातु तस्मै  
नमः प्रजापती रुद्रो वरुणोऽग्निर्दिशां पतिः स नः पशून्पातु सो-  
ऽस्मान्पातु तस्मै नम एता वै देवता एतेषां पशूनामधिपतयस्ताभ्यो  
वा एष आ वृश्च्यते यः पशुशीर्षाण्युपदधाति हिरण्येष्टका उप  
दधात्येताभ्य एव देवताभ्यो नमस्करोति ब्रह्मवादिनः (२२)

वदन्त्यग्नौ ग्राम्यान्पशून्प्र दधाति शुचारण्यानर्पयति किं तत्  
उच्छिष्टं षतीति यद्धिरण्येष्टका उपदधात्यमृतं वै हिरण्यममृतेनैव  
ग्राम्येभ्यः पशुभ्यो भेषजं करोति नैनान् हिनस्ति प्राणो वै  
प्रथमा स्वयमातृणा व्यानो द्वितीयापानस्तृतीयानु प्राण्यात्प्रथमा  
स्वयमातृणामुपधाय प्राणेनैव प्राणं समर्धयति व्यन्यात् (२३)

द्वितीयामुपधाय व्यानेनैव व्यानं समर्धयत्यपान्यात्तृतीयामुपधा-  
समर्धयत्यथो प्राणैरेवैनं समिन्द्रे भूर्भुवः सुवरिति स्वयमातृणा  
उप दधातीमे वै लोकाः स्वयमातृणा एताभिः खलु वै  
व्याहृतीभिः प्रजापतिः प्राजायत यदेताभिर्व्याहृतीभिः स्वयमातृणा  
उपदधातीमानेव लोकानुपधायैषु (२४)

लोकेष्वधि प्र जायते प्राणाय व्यानायापानाय वाचे त्वा  
चक्षुषे त्वा तया देवतयाङ्गिरस्वद्ध्रुवा सीदाग्निना वै देवाः  
सुवर्गं लोकमजिगांसन्तेन पतितुं नाशंकुवन्त एताश्चतस्रः  
स्वयमातृण्णा अपश्यन्ता दिक्षूपदधत् तेन सर्वतश्चक्षुषा सुवर्गं  
लोकमायन्यच्चतस्रः स्वयमातृण्णा दिक्षूपदधाति सर्वतश्चक्षुषैव  
तदग्निना यजमानः सुवर्गं लोकमेति॥ (२५)

ब्रह्मवादिनो व्यन्यादेषु यजमानस्त्रीणि च॥—————[५]

अग्र आ याहि वीतय इत्याहाहृतैवैनमग्निं दूतं वृणीमह  
इत्याह हृतैवैनं वृणीतेऽग्निनाग्निः समिध्यत् इत्याह समिन्द्र  
एवैनमग्निर्वृत्राणि जङ्घनदित्याह समिद्ध एवास्मिन्निन्द्रियं दधात्यग्नेः  
स्तोमम्मनामह इत्याह मनुत एवैनमेतानि वा अह्नां रूपाणि (२६)

अन्वहमेवैनं चिनुतेऽवाह्नां रूपाणि रुन्धे ब्रह्मवादिनो  
वदन्ति कस्मात्सत्याद्यातयाग्नीरन्या इष्टंका अयातयाम्नी लोकं  
पृणेत्यैन्द्राग्नी हि बारहस्पत्येति ब्रूयादिन्द्राग्नी च हि देवानां  
बृहस्पतिश्चायातयामानोऽनुचरवती भवत्यजामित्वायानुष्टुभानु  
चरत्यात्मा वै लोकं पृणा प्राणोऽनुष्टुप्तस्मात्प्राणः सर्वाण्यङ्गान्यनु  
चरति ता अस्य सूददोहसः (२७)

इत्याह तस्मात्पुरुषिपुरुषि रसः सोमं श्रीणन्ति पृश्नय  
इत्याहान्नं वै पृश्न्यन्नमेवाव रुन्धेऽर्को वा अग्निरर्कोऽन्नमन्नमेवाव



रुन्धे जन्मं देवानां विशस्त्रिष्वा रोचने दिव इत्याहेमानेवास्मै लोकां  
ज्योतिष्मतः करोति यो वा इष्टकानां प्रतिष्ठां वेद प्रत्येव तिष्ठति  
तया देवतयाङ्गिरस्वद्ध्रुवा सीदेत्याहेषा वा इष्टकानां प्रतिष्ठा य एवं  
वेद प्रत्येव तिष्ठति॥ (२८)

रूपाणि सूर्यदोहसस्तया षोडश च॥ [६]

सुवर्गाय वा एष लोकाय चीयते यदग्निर्वज्रं एकादशिनी  
यदग्नावैकादशिनीं मिनुयाद्वज्रेणैव५ सुवर्गाल्लोकादन्तर्दध्याद्यन्न  
मिनुयात्स्वरुभिः पशून्व्यर्धयेदेकयूपं मिनोति नैनं वज्रेण  
सुवर्गाल्लोकादन्तर्दधाति न स्वरुभिः पशून्व्यर्धयति वि वा एष  
इन्द्रियेण वीर्येणर्ध्यते योऽग्निं चिन्वन्नधिक्रामत्यैन्द्रिया (२९)

ऋचाक्रमणं प्रतीष्टकामुपं दध्यान्नेन्द्रियेण वीर्येण व्यृध्यते रुद्रो  
वा एष यदग्निस्तस्य तिस्रः शरव्याः प्रतीची तिरश्च्यनूची ताभ्यो  
वा एष आ वृश्च्यते योऽग्निं चिनुतेऽग्निं चित्वा तिसृधन्वमयाचितं  
ब्राह्मणाय दद्यात्ताभ्य एव नमस्करोत्यथो ताभ्य एवात्मानं  
निष्क्रीणीते यत्ते रुद्र पुरः (३०)

धनुस्तद्वातो अनु वातु ते तस्मै ते रुद्र संवत्सरेण नमस्करोमि  
यत्ते रुद्र दक्षिणा धनुस्तद्वातो अनु वातु ते तस्मै ते रुद्र परिवत्सरेण  
नमस्करोमि यत्ते रुद्र पश्चाद्धनुस्तद्वातो अनु वातु ते तस्मै ते  
रुद्रेदावत्सरेण नमस्करोमि यत्ते रुद्रोत्तराद्धनुस्तत् (३१)

वातो॒ अनु॑ वातु ते॒ तस्मै॑ ते रु॒द्रेदु॒वत्स॒रेण॑ नम॑स्करोमि॒ यत्ते॑  
रु॒द्रोपरि॑ धनु॒स्तद्वातो॒ अनु॑ वातु ते॒ तस्मै॑ ते रु॒द्र वत्स॒रेण॑ नम॑स्करोमि  
रु॒द्रो वा ए॒ष यद॒ग्निः स यथा॑ व्या॒घ्रः क्रु॒द्धस्तिष्ठ॑त्ये॒वं वा ए॒ष ए॒तर॒हि  
सञ्चि॑तमे॒तैरुप॑ तिष्ठते नम॑स्कृ॒रैरे॒वैन॑ ॥ शम॑यति॒ यैऽग्नयः॑ (३२)

पु॒री॒ष्याः प्रवि॑ष्टाः पृथि॒वीमनु॑। तेषां॑ त्वम॑स्युत्त॒मः प्र णो॑  
जी॒वात॑वे सु॒व। आप॑ त्वाऽग्ने॒ मन॒साप॑ त्वाऽग्ने॒ तप॒साप॑ त्वाग्ने  
दी॒क्षयाप॑ त्वाग्ने॒ उप॒सद्वि॒राप॑ त्वाग्ने॒ सु॒त्ययाप॑ त्वाऽग्ने॒ दक्षि॑णाभि॒राप॑  
त्वाग्ने॒ऽवभृ॑थेनाप॑ त्वाग्ने॒ व॒शयाप॑ त्वाग्ने॒ स्वगा॑का॒रेणे॒त्याहै॒षा वा  
अ॒ग्नेरा॑प्ति॒स्तयै॒वैन॑माप्रोति॥ (३३)

ऐन्द्रिया पुर उत्तराद्धनुस्तदग्नयं आहाष्टौ च॥ [७]

गा॒य॒त्रेण॑ पु॒रस्ता॒दुप॑ तिष्ठते प्रा॒णमे॒वास्मि॑न्दधाति बृ॒हद्र॑थन्त॒रा-  
भ्या॑ प॒क्षावो॑ज॒ ए॒वास्मि॑न्दधात्यृ॒तुस्था॑य॒ज्ञाय॑ज्ञि॒येन॑ पु॒च्छंमृ॑तुष्वे॒व  
प्रति॑ तिष्ठति पृ॒ष्ठैरुप॑ तिष्ठते तेजो॑ वै पृ॒ष्ठानि॑ तेज॑ ए॒वास्मि॑न्दधाति  
प्र॒जाप॑तिर॒ग्निम॑सृजत॒ सोऽस्मा॑त्सृष्टः परा॑ङ्मै॒त्तं वा॑रव॒न्तीयै॑नावारयत॒  
तद्वा॑रव॒न्तीय॑स्य वा॒रव॒न्तीय॑त्व॒ ॥ श्यै॑तेन॑ श्ये॒ती अ॑कुरुत॒ तच्छ॑तस्य॒  
श्यै॑त॒त्वम् (३४)

यद्वा॑रव॒न्तीयै॑नोप॒तिष्ठ॑ते वा॒रय॑त ए॒वैन॑ ॥ श्यै॑तेन॑ श्ये॒ती कुरु॑ते  
प्र॒जाप॑तेर॒हृद॑येनापिप॒क्षं प्र॑त्युप॑ तिष्ठते प्रे॒माण॑मे॒वास्य॑ गच्छति॒  
प्रा॒च्या त्वा दि॒शा सा॑दयामि गा॒य॒त्रेण॑ छन्द॑सा॒ग्निना॑ दे॒वत॑या॒ग्नेः

शीर्ष्णाग्नेः शिर॒ उप॑ दधामि॒ दक्षि॑णया त्वा दि॒शा सा॑दयामि॒ त्रैष्टु॑भेन॒  
छन्द॑सेन्द्रेण दे॒वत॑याग्नेः प॒क्षेणा॑ग्नेः प॒क्षमु॑प॒ दधामि॒ प्र॒तीच्या॑ त्वा  
दि॒शा सा॑दयामि (३५)

जाग॑तेन॒ छन्द॑सा सवि॒त्रा दे॒वत॑याग्नेः पु॒च्छेना॑ग्नेः पु॒च्छमु॑प॒  
दधा॑म्युदी॒च्या त्वा दि॒शा सा॑दया॒म्यानु॑ष्टुभेन॒ छन्द॑सा मि॒त्रावरु॑णाभ्यां  
दे॒वत॑याग्नेः प॒क्षेणा॑ग्नेः प॒क्षमु॑प॒ दधा॑म्यूर्ध्व॒या त्वा दि॒शा सा॑दयामि॒  
पाङ्के॑न॒ छन्द॑सा बृह॒स्पति॑ना दे॒वत॑याग्नेः पृ॒ष्ठेना॑ग्नेः पृ॒ष्ठमु॑प॒ दधामि॒  
यो वा अ॒पा॑त्मानम॒ग्निं चि॑नुतेऽपा॑त्मा॒मुष्मि॑ल्लो॒के भ॑वति॒ यः सा॑त्मानं  
चि॑नुते सा॒त्मा॒मुष्मि॑ल्लो॒के भ॑वत्यात्मेष्ट॒का उप॑ दधात्येष वा अ॒ग्नेरा॑त्मा  
सा॒त्मान॑मे॒वाग्निं चि॑नुते सा॒त्मा॒मुष्मि॑ल्लो॒के भ॑वति॒ य ए॒वं वेद॑॥ (३६)

श्यै॒तत्त्वं प्र॒तीच्या॑ त्वा दि॒शा सा॑दयामि॒ यः सा॑त्मानंश्चिनुते द्वाविं॑शतिश्च॥ ————— [८]

अ॒ग्नं उ॒दधे॒ या त॒ इषु॑र्यु॒वा नाम॒ तया॑ नो मृ॒ड तस्या॑स्ते  
नम॑स्तस्या॑स्त॒ उप॒ जीव॑न्तो भूया॒स्माग्ने॑ दु॒ध ग॒ह्य कि॑शिल वन्य॒  
या त॒ इषु॑र्यु॒वा नाम॒ तया॑ नो मृ॒ड तस्या॑स्ते नम॑स्तस्या॑स्त॒ उप॒  
जीव॑न्तो भूया॒स्म प॒ञ्च वा ए॒तैः अ॒ग्नयो॑ यच्चि॒तय॑ उ॒दधि॑रे॒व नाम॑ प्रथ॒मो  
दु॒धः (३७)

द्वि॒तीयो॒ ग॒ह्यस्तृ॑तीयः कि॑शिलश्चतु॒र्थो वन्यः॑ पञ्च॒मस्तेभ्यो॒  
यदाहु॑ती॒र्न जु॑हुयादध्व॒र्यु च॒ यज॑मानं च॒ प्र द॑हेयुर्यदे॒ता  
आहु॑तीर्जुहोति॑ भा॒गधे॑येनै॒वैना॑ञ्छमयति॒ नार्ति॑माच्छत्यध्व॒र्युर्न

यज॑मानो॒ वाङ्म॑ आ॒सन्न॒सोः प्रा॒णोऽक्ष्योश्चक्षुः॑ कर्णयोः॒ श्रोत्रं॑  
बाहु॑वोर्बल॑मू॒रोजोऽरि॑ष्टा विश्वा॒न्यङ्गानि॑ त॒नूः (३८)

त॒नुवा॑ मे स॒ह नम॑स्ते अस्तु॒ मा मां हि॒॑सीर॒प॒ वा  
ए॒तस्मा॑त्प्रा॒णाः क्रा॑मन्ति॒ योऽग्निं॑ चि॒न्वन्न॑धि॒क्राम॑ति॒ वाङ्म॑  
आ॒सन्न॒सोः प्रा॒ण इत्या॑ह प्रा॒णाने॒वाऽऽत्म॑न्ध॒त्ते यो रु॒द्रो अ॒ग्नौ यो  
अ॒प्सु य ओष॑धीषु॒ यो रु॒द्रो विश्वा॑ भुव॑नावि॒वेश॒ तस्मै॑ रु॒द्राय॑  
नमो॑ अ॒स्त्वाहु॑तिभागा॒ वा अ॒न्ये रु॒द्रा हु॒विर्भा॑गाः (३९)

अ॒न्ये श॑त॒रु॒द्रीय॑ ह॒त्वा गा॑वीधु॒कं च॒रुमे॑तेन॒ यजु॑षा  
च॒रमा॑या॒मिष्ट॑कायां॒ नि द॑ध्याद्वा॒गधे॑र्ये॒नैवैन॑ श॒मय॑ति॒ तस्य॑ त्वे  
श॑त॒रु॒द्रीय॑ ह॒तमि॑त्या॒हुर्य॑स्यै॒तद॒ग्नौ क्रि॑यत॒ इति॑ वस॑वस्त्वा  
रु॒द्रैः पुर॑स्ता॒त्पान्तु॑ पि॒तर॑स्त्वा य॒मरा॑जानः पि॒तृभि॑र्दक्षिण॒तः  
पा॑न्त्वादि॒त्यास्त्वा॒ विश्वे॑र्दे॒वैः प॒श्चात्पा॑न्तु द्यु॒तान॑स्त्वा॒ मारु॑तो  
म॒रुद्भि॑रु॒त्तर॑तः पा॒तु (४०)

दे॒वास्त्वेन्द्र॑ज्ये॒ष्ठा वरु॑णरा॒जानोऽध॑स्ता॒च्चोप॑रि॒ष्टाच्च॑ पा॒न्तु न वा  
ए॒तेन॑ पू॒तो न मे॒ध्यो न प्रो॑क्षि॒तो यदे॑न॒मतः॑ प्रा॒चीनं॑ प्रो॒क्षति॑  
य॒त्सञ्चित॑माज्ये॒न प्रो॑क्षति॒ तेन॑ पू॒तस्तेन॑ मे॒ध्यस्तेन॑ प्रो॒क्षितः॥ (४१)

दुध॑स्त॒नूर॑ह॒विर्भा॑गाः पा॒तु द्वात्रि॑ंशच्च॥ [९]

स॒मीची॑ नामा॑सि॒ प्राची॑ दि॒क्तस्या॑स्तेऽग्नि॒रधि॑पति॒रसि॑तो र॒क्षिता॑  
यश्चाधि॑पतिर्यश्च गो॒प्ता ता॒भ्यां नम॑स्तौ नो मृ॒डय॑ता॒न्ते यं द्वि॑ष्मो यश्च

नो॒ द्वेष्टि॑ तं वा॒ जम्भे॑ दधाम्योज॒स्विनी॒ नामा॑सि दक्षि॒णा दि॒क्तस्या॑स्त  
इन्द्रोऽधि॑पतिः पृ॒दाकुः प्राची॒ नामा॑सि प्र॒तीची॒ दि॒क्तस्या॑स्ते (४२)

सोमोऽधि॑पतिः स्व॒जोऽव॑स्थावा॒ नामा॑स्यु॒दीची॒ दि॒क्तस्या॑स्ते  
वरु॒णोऽधि॑पतिस्तिरश्च॑राजिरधि॑पत्नी॒ नामा॑सि बृ॒हती॒ दि॒क्तस्या॑स्ते  
बृ॒हस्पति॑रधि॑पतिः श्वि॒त्रो व॑शिनी॒ नामा॑सीयं दि॒क्तस्या॑स्ते य॒मो-  
ऽधि॑पतिः क॒ल्माष॑ग्रीवो रक्षि॒ता यश्चाधि॑पतिर्यश्च॑ गो॒प्ता ताभ्यां॑  
नम॒स्तौ नो॑ मृडयतान्ते यं द्वि॒ष्मो यश्च॑ (४३)

नो॒ द्वेष्टि॑ तं वा॒ जम्भे॑ दधाम्ये॒ता वै दे॒वता॑ अ॒ग्निं चि॒त२ र॑क्षन्ति  
ताभ्यो॒ यदाहु॑तीर्न जु॒हुयाद॑ध्व॒र्युं च॒ यज॑मानं च ध्याये॒युर्यदे॒ता  
आहु॑तीर्जु॒होति॑ भा॒गधेये॑नै॒वैना॑ञ्छमयति॒ नार्ति॑माच्छत्यध्व॒र्युर्न  
यज॑मानो हे॒तयो॒ नाम॑ स्थ॒ तेषां॑ वः पु॒रो गृ॒हा अ॒ग्निर्व॒ इष॑वः  
सलि॒लो निलि॑म्पा नाम॑ (४४)

स्थ॒ तेषां॑ वो दक्षि॒णा गृ॒हाः पि॒तरो॑ व॒ इष॑वः स॒गरो॑ व॒ज्रिणो॒  
नाम॑ स्थ॒ तेषां॑ वः प॒श्चाद्गृ॒हाः स्व॒प्नो॑ व॒ इष॑वो ग॒ह्वरो॑ऽव॒स्थावा॑नो  
नाम॑ स्थ॒ तेषां॑ व॒ उत्त॑राद्गृ॒हा आपो॑ व॒ इष॑वः स॒मुद्रो॑ऽधि॑पतयो॒ नाम॑  
स्थ॒ तेषां॑ व॒ उप॑रि॒ गृ॒हा व॒रु॑षं व॒ इष॑वोऽव॒स्वान्क्र॒व्या नाम॑ स्थ॒  
पार्थि॑वास्तेषां॑ व॒ इ॒ह गृ॒हाः (४५)

अ॒न्नं व॒ इष॑वो निमि॒षो वा॑तना॒मन्तेभ्यो॑ वो नम॒स्ते नो॑ मृडयत  
ते यं द्वि॒ष्मो यश्च॑ नो॒ द्वेष्टि॑ तं वो॒ जम्भे॑ दधामि हु॒तादो॒ वा अ॒न्ये

दे॒वा अ॑हु॒तादोऽन्ये॑ ता॒न॑ग्नि॒चिदे॒वोभया॑न्प्रीणाति द॒ध्रा म॑धुमि॒श्रेणै॑ता  
आहु॑तीर्जुहोति भा॒ग॒धेये॑नै॒वैना॑न्प्रीणा॒त्यथो॑ खल्वा॒हुरिष्ट॑का॒ वै दे॒वा  
अ॑हु॒ताद् इति॑ (४६)

अ॒नु॒परि॒क्रामं॑ जुहोत्य॒परि॒वर्गमे॒वैना॑न्प्रीणाती॒म॒ऽस्तन॑मूर्ज॒स्वन्तं॑  
धया॒पां प्र॒प्या॑तम॒ग्ने सरि॑रस्य॒ मध्ये॑। उ॒त्सं जुष॑स्व॒ मधु॑मन्तमूर्व  
समु॒द्रिय॑ऽसद॑न॒मा वि॑शस्व। यो वा अ॒ग्निं प्र॒युज्य॑ न वि॒मुञ्चति॑  
यथा॒श्वो यु॒क्तोऽवि॑मुच्यमा॒नः क्षु॒ध्यन्परा॑भव॒त्येवम॑स्या॒ग्निः परा॑  
भवति॒ तं परा॑भवन्तं॒ यज॑मा॒नोऽनु॒ परा॑ भवति॒ सोऽग्निं॑ चित्वा  
लू॒क्षः (४७)

भ॒व॒ती॒म॒ऽस्तन॑मूर्ज॒स्वन्तं॑ धया॒पामि॒त्याज्य॑स्य पूर्णा॒ऽसुचं॑  
जुहो॒त्येष॑ वा अ॒ग्नेर्वि॒मोको॑ वि॒मुच्यै॒वास्मा॑ अन्नमपि॑ दधाति॒  
तस्मा॑दाहु॒र्यश्चै॒वं वेद॑ यश्च॒ न सु॒धाय॑ऽह॒ वै वा॒जी सु॒हितो॑  
दधा॒तीत्य॑ग्नि॒र्वाव वा॒जी तमे॒व तत्प्री॑णाति॒ स ए॒नं प्री॑तः प्री॒णाति॑  
वसी॑यान्भवति॥ (४८)

प्रतीची दिक्तस्यास्ते द्विप्पो यश्च निलिप्सा नामेह गृहा इति लूक्षो वसीयान्भवति॥—[१०]

इन्द्रा॑य॒ राज्ञे॑ सू॒करो॑ वरु॒णाय॑ राज्ञे॒ कृष्णो॑ य॒माय॑ राज्ञ॒ ऋश्य॑  
ऋष॒भाय॑ राज्ञे॑ गव॒यः शा॑र्दूलाय॒ राज्ञे॑ गौ॒रः पु॑रुषरा॒जाय॑ म॒र्कटः॑  
क्षिप्र॑श्येनस्य॒ वर्तिका॑ नील॒गोः क्रि॒मिः सोम॑स्य॒ राज्ञः॑ कुलुङ्गः॒

सिन्धोः शि॒शुमारो हिमव॑तो ह॒स्ती॥ (४९)

इन्द्रा॑या॒ष्टविंशतिः॥ [११]

म॒युः प्रा॑जाप॒त्य ऊ॒लो ह॒ली॑क्ष्णो वृषद॒शस्ते॑ धा॒तुः सर॑स्वत्यै  
शा॒रिः श्ये॒ता पु॑रुष॒वाख्स॑र॒स्वते॑ शु॒कः श्ये॒तः पु॑रुष॒वागा॑र॒ण्योऽजो॑  
न॒कुलः॑ शका॒ ते पौ॒ष्णा वा॒चे क्रौ॒ञ्चः॥ (५०)

म॒युस्त्रयो॑विंशतिः॥ [१२]

अ॒पां न॒त्रे ज॒षो ना॒क्रो म॒करः॑ कुली॒कय॑स्तेऽकू॒पार॑स्य वा॒चे  
पैङ्ग॑रा॒जो भ॒गाय॑ कु॒षीत॑क आ॒ती वा॑ह॒सो द॒र्विदा॑ ते वा॒यव्या॑  
दि॒ग्भ्यश्च॑क्रवा॒कः॥ (५१)

अ॒पामेका॑न्नविंशतिः॥ [१३]

ब॒लाया॑जग॒र आ॒खुः सृ॒जया॑ श॒यण्ड॑क॒स्ते मै॒त्रा मृ॒त्यवे॑ऽसि॒तो  
म॒न्यवे॑ स्व॒जः कु॑म्भी॒नसः॑ पुष्करसा॒दो लो॑हिता॒हिस्ते॑ त्वा॒ष्ट्राः  
प्र॒तिश्रु॑त्का॒यै वा॑ह॒सः॥ (५२)

[१४]

पु॒रुष॑मृ॒गश्च॑न्द्रम॑से गो॒धा का॒ल॑का दा॒र्वाघा॑टस्ते वन॒स्पती॑नामे॒ण्यह्ने॑  
कृ॒ष्णो रा॒त्रि॒यै पि॒कः क्षि॒वङ्का नी॒ल॑शी॒र्ष्णी ते॑ऽर्य॒म्णे धा॒तुः  
क॑त्कटः॥ (५३)

[१५]

सौरी ब॒लाक॑श्यो म॒यूरः श्ये॒नस्ते ग॑न्ध॒र्वाणां व॑सू॒नां क॒पिञ्ज॑लो  
रु॒द्राणां॑ ति॒त्तिरी रो॑हि॒त्कुण्ड॑णार्ची गो॒लत्ति॑का ता अ॒प्सर॑सा॒मर॑ण्याय  
सृ॒मरः॥ (५४)

[१६]

पृ॒षतो वै॑श्वदे॒वः पि॒त्वो न्य॑ङ्कुः क॒शस्तेऽनु॑म॒त्या अ॒न्यवा॒पो-  
ऽर्ध॑मा॒सानां॑ मा॒सां क॒श्यपः॑ क॒रिः कु॑टरु॒र्दात्यो॑ह॒स्ते सि॑नीवा॒ल्यै  
बृ॒हस्प॑तये शि॒त्पुटः॥ (५)

[१७]

शका॑ भौमी पा॒त्रः क॒शो मा॒न्थील॑व॒स्ते पि॑तृ॒णामृ॑तू॒नां ज॑हं॒का  
सं॒वत्स॑राय॒ लोपा॑ क॒पोत॑ उ॒लूकः॑ श॒शस्ते॑ नैर्ऋ॒ताः कृ॑क॒वाकुः॑  
सा॒वि॒त्रः॥ (५६)

बलाय॑ पुरुषमृगः सौरी पृषतः शकाष्टादशाष्टादश॥ [१८]

रु॒रू रौ॒द्रः कृ॑क॒लासः॑ श॒कुनिः॑ पि॒प्पका॑ ते श॒रव्या॑यै  
ह॒रि॒णो मा॑रु॒तो ब्र॑ह्म॒णे शा॑र्ग॒स्तर॑क्षुः कृ॒ष्णः श्वा च॑तु॒रक्षो॑ ग॒र्दभ॑स्त  
इ॒तर॑ज॒नाना॑म॒ग्नये॑ धू॒ङ्गा॥ (५७)

रुरुर्विशतिः॥ [१९]

अ॒लज॑ आ॒न्तरि॑क्ष उ॒द्रो म॒द्गुः प्ल॒वस्ते॑ऽपाम॒दित्यै॑  
ह॒स॒साचि॑रिन्द्रा॒ण्यै की॑र्शा गृ॒ध्रः शि॑ति॒कक्षी॑ वा॒घ्राण॑स्ते  
दि॒व्या द्या॑वापृथि॒व्या श्वा॑वित्॥ (५८)



[२०]

सु॒पर्णः पा॑र्जन्यो ह॒ः सो वृ॒को वृष॑द॒ः शस्त ऐ॒न्द्रा अ॒पामु॒द्रो-  
ऽर्य॑म्णे लो॒पा॒शः सि॒ः हो न॑कुलो व्या॒घ्रस्ते म॑हेन्द्राय॒ कामा॑य॒  
पर॑स्वान्॥ (५९)

अ॒लजः सु॒पर्णाँ ऽष्टा॑द॒शाष्टा॑द॒शः॥ [२१]

आ॒ग्नेयः कृ॒ष्णग्री॑वः सा॒रस्व॑ती मे॒षी ब॒भ्रुः सौ॒म्यः पौ॒ष्णः श्या॒मः  
शि॑तिपृ॒ष्ठो बा॑र्हस्प॒त्यः शि॒ल्पो वै॑श्वदे॒व ऐ॒न्द्रो ऽरु॑णो मा॒रुतः क॒ल्माष॑  
ऐ॒न्द्रा॒ग्नः स॑हि॒तो ऽधो॑रा॒मः सा॒वि॒त्रो वा॑रु॒णः पे॒त्वः॥ (६०)

आ॒ग्नेयो द्वा॒विंश॑तिः॥ [२२]

अश्व॑स्तू॒परो गो॑मृ॒गस्ते प्रा॑जाप॒त्या आ॑ग्ने॒यौ कृ॒ष्णग्री॑वौ त्वा॒ष्टौ  
लो॒मश॑स॒क्थौ शि॑तिपृ॒ष्ठौ बा॑र्हस्प॒त्यौ धा॒त्रे पृ॑षो॒दरः सौ॒र्यो ब॒लक्षः॑  
पे॒त्वः॥ (६१)

अश्वः षोड॑शः॥ [२३]

अ॒ग्नये॑ऽनी॒कव॑ते रोहि॒ताञ्जि॑रन॒ड्वान॒धोरा॑मौ सा॒वि॒त्रौ पौ॒ष्णौ  
र॑ज॒तना॑भी वैश्वदे॒वौ पि॒शङ्गौ तू॒परो मा॑रु॒तः क॒ल्माष॑ आ॒ग्नेयः  
कृ॒ष्णो ऽजः सा॑रस्व॒ती मे॒षी वा॑रु॒णः कृ॒ष्ण ए॒क॑शि॒तिपा॒त्पे॒त्वः (६२)

अ॒ग्नयोऽनी॒कव॑ते द्वा॒विंश॑तिः॥ [२४]

[यदेकै॒न प्र॒जाप॑तिः प्रे॒णानु॑ यजु॒पापो॑ वि॒श्वक॑र्मा॒ग्न आ या॑हि सुव॒र्गाय॑ वज्रो॑ गाय॒त्रेणा॒ग्नं उ॒दधे॑  
स॒मीची॑न्द्रा॒य म॒युर॑पां बला॒य पुरु॑षमृ॒गः सौ॒री पृ॑ष॒तः शका॑ रु॒रु॒रल॒जः सु॒पर्ण आ॑ग्ने॒यो ऽश्वो॑ऽग्नये॒ऽनी॒कव॑ते

चतुर्विंशतिः॥२४॥ यदेकैन् स पापीयानेतद्वा अग्नेर्धनुस्तद्देवास्त्वेन्द्रं ज्येष्ठा अपां नप्रेऽश्वस्तूपरो द्विषष्टिः॥६२॥  
यदेकैकशितिपात्येत्वंः॥]

॥हरिः ॐ॥

ष्ण-यजुर्वेदीय-तैत्तिरीय-संहितायां पञ्चमकाण्डे पञ्चमः प्रश्नः समाप्तः॥५॥



generated on **July 11, 2024**

Downloaded from



<http://stotrasamhita.github.io> |  StotraSamhita | Credits